

per persunas d'instrucziun, mainasculas e cussagls da scoula

Nr. 2 2023/24

Part generela

Glista naira da la CDEP/EDK

La conferenza da las directuras e dals directuors chantunels da l'educaziun publica (EDK/CDEP) maina üna glista da persunas d'instrucziun cha l'autorisaziun per instruir es gnida retratta. La glista naira pussibilitescha als cussagls da scoula d'examiner scha l'autorisaziun per instruir es gnida pigliada davent ad üna persuna d'instrucziun i'l ram d'üna procedura chantunela. Per ch'üna retratta da l'autorisaziun per instruir possa gnir examinada i'l chantun Grischun, es il departamaint d'educaziun, da cultura e da la protecziun da l'ambient (DECA) aviso sün ün'annunzcha da quistas persunas d'instrucziun tres il cussagl da scoula. Impü annunzcha nouv la procedura publica dal Grischun al DECA proceduras penelas relevantas e decisiuns da proceduras terminedas, per ch'üna eventuela retratta tres il departamaint possa gnir examinada.

[CDEP: Retratta autorisaziun per instruir](#)



Duos novs mezs d'instrucziun sec. I

La regenza ho approvo l'elavuraziun da documainta pel mez d'instrucziun 'Schauplatz Ethik 7-9' per taliaun. Impü ho la regenza do glüsch verda per la traducziun dal mez d'imprender online existent 'Profolio' pel ram 'Orientaziun professiu-nela' in sursilvan. Ad es previs cha'l mez d'instrucziun gnia schlargio süllas ulteriuras regions linguisticas tenor bsögn.

Mediomatix

La pagina d'internet dal mez d'instrucziun 'Mediomatix' es gnida surelavureta cumplettamaing. Zieva la tscherna da l'idiom paun gnir consultedas online las survistas dals cuntgnieus per mincha tom e tuot ils cuntgnieus da la 'Grammatica da scola'. La pagina d'internet permetta nouv eir l'inte-

graziun d'exercizis online. Quists vegnan in ün prüm pass elavuros i'l ram dal proget 'Mediomatix surmiran' e pü tard prubabelmaing eir realisos pels ulteriurs idioms. Pel mumaint staun a disposiziun 15 exercizis per la 3. classa in surmiran. Natürelmaing as chatta sülla pagina d'internet inavaunt ils tschegns per cumprer ils mezs d'instrucziun, l'adöver dals e-books ed il support.

[Pagina d'internet Mediomatix](#)



Tschercho piazzas da praticum

La Scoul'ota da pedagogia (SAPGR) crescha. 650 piazzas da praticum vegnan druvedas per las studentas ed ils students da la SAPGR be per l'an 2023. La qualited da la scolaziun dependa impustüt da la qualited da las persunas d'instrucziun da pratcha. A profitan tuottas duos varts: Las studentas ed ils students imprendan da l'esperienza da las persunas d'instrucziun. Las scoulas da l'otra vart paun acquirer e lier studentas e students talentos vi da lur teams. Mainasculas vegnan supplichos d'annunzcher persunas d'instrucziun adattedas directamaing al mneder da la pratcha professiu-nela, sar Men Gustin.

[Adressa da contact Men Gustin](#)



Admissiun SeS ucrainais a scoulas medias

Las cundiziuns per l'admissiun da scolaras e scolars ucrainais cul status da protecziun 'S' a las scoulas medias sun sclaridas. L'admissiun es pussibla suot tschertas premissas. Ulteriuras infurmaziuns as chatta sün ün fögl d'infurmaziun cha l'uffizi per la furmaziun media-superiura ho s-chaffieu.

[Fögl d'infurmaziun: Scolaras e scolars da l'Ucraina in scoulas medias grischunas](#)



Promouwer la furmaziun da medias

La furmaziun da medias tuocha hozindi tar las incumbenzas indispensablas da mincha scoula. Per persunas d'instrucziun e mainascoulas significha que da s'occupar activamaing da dumandas scu: Cu vegnan medias digitelas drivedas da maniera nüzzaivla, che pussibiliteds do que? Che significha que in connex culla rolla da la persuna d'instrucziun? 'Giuventüna e medias', la plattafuorma naziunela per la promoziun da competenzas medielas, spordscha numerus cuntgnieus per druver medias digitelas da maniera radschunaivla ill'instrucziun.

[Furmaziun da medias – sfida per la scoula](#)



[Survista da temas davart medias digitelas](#)



UNESCO – patrimoni mundiel in Svizra

Üna nouva pagina d'internet interactiva preschainta ils patrimoni mundiels da l'UNESCO in Svizra scu lös d'imprender dadour la scoula la prüma vouta sün ün'unica plattafuorma. Furmaziun i'l patrimoni mundiel es ün imprender cul cho, cul cour e cul maun. Sülla nouva plattafuorma – ch'id es accessibla gratuitamaing - as tratta tuot dals monumaints da natüra e cultura ils pü particulers da la Svizra. La pagina d'internet spordscha traunter oter üna pruna viedis da scoula, guidas u eivnas da proget. Üna rolla importanta survain eir il materiel da scoula per l'integraziun dal patrimoni mundiel ill'instrucziun. La plattafuorma s'orientescha als ciclus dal Plaun d'instrucziun 21 e vain completteda cuntinuedamaing cun novs cuntgnieus interessants.

[Pagina d'internet 'nos patrimoni'](#)



Prüm Poetry Slam contest per giuvenils

L'an 2004 sto suot l'insaina dal giubileum '500 ans Stedi liber da las Trais Lias'. Per quist'occorrenza vain miss in plets e quinteda l'istorgia da nos chantun our da la vista dals giuvenils – e rapreschanteda sül palc in möd modern cun Slam-Poetry! Giuvenils paun s'annunzcher per quist proget interessant. In occasiun da lavuratori da duos dis in l'inter chantun vegnan scolaras e scolaras cusglios e trenos dal poet da slam, autur e cabarettist grischun Jachen Wehrli per esser fits pel palc. Uossa ho que nom da's parteciper! Nus giavüschains a tuot las persunas d'instrucziun da render attent a lur scolaras e scolaras sül contest e da discuter la publicaziun cun ellas e cun els.

[Infurmaziuns cun video explicativ](#)



La chüra da daints i'l Grischun

La chüra da daints i'l minchadi da scoula es ün factur elementer per promouwer la sandet e l'egualisaziun da las schanzas da nossas scolaras e noss scolaras. La profilaxa da daints es ün'istorgia da success: Daspö l'introducziun da la chüra da daints in scoula s'ho il caries tals iffaunts diminuieu per 90 pertschient. Ils exercizis per laver ils daints cha persunas d'instrucziun ingaschedas surpiglian mincha quartal haun üna grand'importanza. La chüra da daints as basa sün ün concept chi vain ordino dal chantun. Nus recugnuschains a las persunas d'instrucziun per lur fadias

d'integrer il laver daints in lur plaun da scoula. Uschè vegnan promovieus daints sauns e la sandet da nossas scolaras e noss scolaras in generel.

[Newsletter scoulas \(scroller fin giosom\)](#)



Pel cumgio

Aunz precis 20 ans es gnieu tramiss il prüm INFO per persunas d'instrucziun, mainascoulas e cussagls da scoula. Daspö quel temp sun gnieu comunicos temas actuels da la scoula inclusiv idejas per als approfondir in 142 circuleras, tuottas tradüttas illas linguas da scoula.

Eau ingrazch a mieu team pel grand ingaschamaint a favur da la scoula populera grischuna e pel grondius sustegn ch'eu d'he pudieu giodair scu mneder da l'inspectorat da scoula in quist lung temp – saja que in tuot ils sectuors da lavur u i'l ram da numerus progets da scoula chantunels. Eau giavüsch a tuot las magistras e magisters, mainascoulas e cussagls da scoula bger plaschair e success cun furmer lur scoula e l'instrucziun uschè cha noss iffaunts e giuvenils posan inchaminer lur via futura cun optimissem, sgürezza persunela e curaschi. Grazcha.

Andrea Caviezel, mneder inspectorat da scoula

Cordiels salüds

Chantal Marti-Müller
Mnedra USS

Andrea Caviezel
Mneder inspectorat da scoula

Part regiunela

Termins

Data	Occurrenza	Adressos
13-11-2023	Occurrenza d'infurmaziun	CS
14-11-2023	Occurrenza d'infurmaziun	CS
29-11-2023	Accent tematic 'Musica'	PI annunzchedas
26-01-2024	Assegnaziun provisorica	6. cl./1.R
26-01-2024	Attestat da semester	Tuots
15-04-2024	Assegnaziun definitiva	6. cl./1.R
28+29-05-2024	Examen da recuors	6. cl./1.R
05-06-2024	Barat regiunel in connex cull'EVA dal ram IND	PI 3. sec I

[Ulteriurs termins](#)



Cordiels salüds

Inspectorat districtuel Engiadina-Val Müstair-Samignun
Bettina Salutt, Urs Kühne, Curdin Lansel

